



Bosnia and Herzegovina
Federation of Bosnia and Herzegovina

**CANTON SARAJEVO
ASSEMBLY**

Na osnovu člana 18. stav 1. tačka b) Ustava Kantona Sarajevo („Službene novine Kantona Sarajevo“ br.: 1/96, 2/96 - Ispravka, 3/96 - Ispravka, 16/97, 14/00, 4/01, 28/04, 6/13 i 31/17) Skupština Kantona Sarajevo na 52. Radnoj sjednici održanoj dana 29.04. 2022. godine donijela je

ZAKON

O POSEBNIM PROGRAMIMA KANTONA SARAJEVO ZA MEMORIJALIZACIJU GENOCIDA, PODRŠKU POVRATKU I RAZVOJU SREBRENICE, POMOĆI ŽRTVAMA I PORODICAMA ŽRTAVA GENOCIDA NAD BOŠNJACIMA ZAŠTIĆENE ZONE UN „SREBRENICA“

I – OPĆE ODREDBE

Član 1. (Predmet)

Zakonom o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN „Srebrenica“ (u daljem tekstu: zakon) se uređuju mjere Vlade Kantona Sarajevo (u daljem tekstu: Vlada) za usmjerene aktivnosti za održivi povratak, razvojne projekte i obnovu u jedinici lokalne samouprave Srebrenica, mjere podrške aktivnostima istraživanja i obilježavanja genocida u Srebrenici i mjere podsticaja i podrške žrtvama genocida i porodicama žrtava genocida nad Bošnjacima zaštićene zone UN „Srebrenica“, licima sa prijavljenim prebivalištem na području opštine Srebrenica, izbjeglim, raseljenim licima, povratnicima, te licima koja su se vratila sa područja Kantona Sarajevo na područje jedinice lokalne samouprave Srebrenica od strane institucija Kantona Sarajevo i njihovim potomcima.

Član 2. (Poseban interes i značaj za Kanton Sarajevo)

- (1) Posebni programi podrške uređeni ovim zakonom predstavljaju aktivnosti od posebnog interesa za Kanton Sarajevo u svrhu doprinosa i odgovornosti Kantona za provedbu Aneksa VII Općeg okvirnog sporazuma za mir u BiH (Sporazum o povratku izbjeglica i raseljenih osoba).
- (2) Vlada je dužna posebne programe podrške uređene ovim zakonom učiniti prioritetom prilikom planiranja aktivnosti.

Član 3.
(Zaštita prava i zabrana ograničenja)

- (1) Ovim zakonom se ne može uskratiti ostvarivanje prava izbjeglih, raseljenih lica, povratnika, lica sa prijavljenim prebivalištem u Srebrenici, žrtava i porodica žrtava genocida nad Bošnjacima zaštićene zone UN-a „Srebrenica“, a koja ostvaruju po osnovu drugih važećih zakona.
- (2) Ovim zakonom se ne može ograničiti podrška aktivnostima vezanim za povratak u Srebrenicu, ekonomski razvoj Srebrenice, memorijalizacije genocida, podrške žrtvama i porodicama žrtava genocida nad Bošnjacima zaštićene zone UN-a „Srebrenica“, a koju institucije Kantona Sarajevo provode u sklopu svojih drugih redovnih aktivnosti ili po osnovu odluka i javnih poziva koje omogućavaju pristup sredstvima druge namjene.

Član 4.
(Pojmovi vezani za primjenu)

- (1) Genocid u Srebrenici, u smislu ovog zakona, predstavlja zločine počinjene nad Bošnjacima zaštićene zone UN-a „Srebrenica“ od jula 1995. godine na području zaštićene zone „Srebrenica“, definisane u pravomoćnim presudama Međunarodnog suda pravde, Međunarodnog krivičnog suda za bivšu Jugoslaviju, Suda Bosne i Hercegovine na širem području regije istočna Bosna, kao i na pravcu progona „Marša smrti“.
- (2) Jedinicom lokalne samouprave Srebrenica, u smislu ovog zakona, smatrat će se teritorija današnje opštine Srebrenica u bosanskohercegovačkom entitetu Republika Srpska.
- (3) Regija istočna Bosna, u smislu ovog zakona, smatrat će se teritorija današnjih opština Srebrenica, Bratunac, Milići, Vlasenica, Han Pijesak, Sokolac, Zvornik, Osmaci, Višegrad, Rogatica u bosanskohercegovačkom entitetu Republika Srpska.

Član 5.
(Status lica)

- (1) Žrtve genocida, u smislu ovog zakona, su sva lica koja su ubijena ili su nestala u genocidu, kao i lica koja su prognana, transportovana i/ili deportovana sa područja zaštićene zone Ujedinjenih nacija „Srebrenica“ od jula 1995. godine do potpisivanja Općeg okvirnog Sporazuma za mir u Bosni i Hercegovini.
- (2) Porodicama žrtava genocida u Srebrenici, u smislu ovog zakona, smatraju se roditelji/staratelji, dijete, supružnik, brat/sestra, djed/nana, unuk ubijenog, nestalog ili prognanog lica sa područja zaštićene zone UN-a „Srebrenica“ od jula 1995. godine do potpisivanja Općeg okvirnog Sporazuma za mir u Bosni i Hercegovini.
- (3) Izbjeglica sa područja jedinice lokalne samouprave Srebrenica u smislu ovog zakona je državljanin Bosne i Hercegovine koji se nalazi izvan BiH, a koji je zbog sukoba prognan sa svog prebivališta ili je napustio svoje prebivalište u Srebrenici i izbjegao u inostranstvo, nakon 30. aprila 1991. godine bojeći se opravdano, da će biti progonjen zbog svoje rase, vjere, nacionalnosti, pripadnosti nekoj socijalnoj grupi ili svojih političkih mišljenja i koji nije u mogućnosti da se sigurno i dostojanstveno vrati na svoje ranije prebivalište niti je dobrovoljno, odlučio da se trajno nastani izvan BiH.

- (4) Raseljeno lice sa područja jedinice lokalne samouprave Srebrenica je državljanin Bosne i Hercegovine koje ima prijavljeno boravište na području Kantona Sarajevo, a koji je zbog posljedica sukoba prognan sa svog prebivališta ili je napustio svoje prebivalište nakon 30. aprila 1991. godine na području Srebrenice, bojeći se opravdano da će biti progonjen zbog svoje rase, vjere, nacionalnosti, pripadnosti nekoj socijalnoj grupi ili svojih političkih mišljenja i koji nije u mogućnosti da se sigurno i dostojanstveno vrati na svoje ranije prebivalište, niti je dobrovoljno odlučio da se trajno nastani na drugom prebivalištu.
- (5) Povratnik je izbjeglo lice ili raseljeno lice sa područja jedinice lokalne samouprave Srebrenica koja se vratila u svoje ranije prebivalište. Povratniku prestaje status protekom roka od šest mjeseci, računajući od dana kada se ponovo nastanio u svoje ranije prebivalište, odnosno trajno nastanio u drugo mjesto prebivališta u BiH.
- (6) Lice koje se vratilo sa područja Kantona Sarajevo na područje jedinice lokalne samouprave Srebrenica je lice kojem je prestao status povratnika, a koje može dokazati svoje ranije boravište na području Kantona Sarajevo i trenutno prebivalište na području jedinice lokalne samouprave Srebrenica.
- (7) Potomak lica iz st. (3), (4), (5) i (6) ovog zakona je dijete ili unuk lica koje ispunjava predviđene uslove.
- (8) Drugo lice, u smislu ovog zakona, je lice koje ima prijavljeno prebivalište na području opštine Srebrenica, a ne ispunjava uslove statusa po drugim osnovama navedenim u st. (1), (2), (3), (4), (5), (6) i (7) ovog člana.
- (9) Lice nije obavezno dokazivati status po više različitih osnova iz ovog člana.

II – PRISTUP PROGRAMIMA I DOKAZIVANJE STATUSA

Član 6.

(Ravnopravnost izbjeglih, raseljenih lica, povratnika i lica koja su se vratila sa područja Kantona Sarajevo na područje jedinice lokalne samouprave Srebrenica, njihovih potomaka, žrtava genocida i porodica žrtava genocida)

- (1) Ovaj zakon garantuje ravnopravnost lica iz člana 5. st. (1), (2), (3), (4), (5), (6) i (7) ovog zakona u smislu pristupa programima i pravima koja ostvaruju kao fizička lica, odnosno pravna lica čiji su suvlasnici/vlasnici, u smislu ovog zakona.
- (2) Sva lica koja imaju prijavljeno prebivalište na području opštine Srebrenica, a ne ispunjavaju uslove za dokazivanje statusa po osnovu člana 5. st. (1), (2), (3), (4), (5), (6) i (7) ovog zakona mogu ostvariti prava na način utvrđen ovim zakonom.

Član 7.

(Dokazivanje statusa žrtve genocida ili porodice žrtve genocida)

- (1) Lica iz člana 5. st. (1) i (2) ovog zakona svoj status dokazuju potvrdom koju izdaje Ured Vlade Kantona Sarajevo za podršku Srebrenici (u daljem tekstu: Ured).
- (2) Lica iz člana 5. st. (1) i (2) ovog zakona nisu dužna da dokazuju svoje prijeratno ili trenutno prebivalište na području jedinice lokalne samouprave Srebrenica.
- (3) Ured će provesti konsultacije sa udruženjima porodica žrtava genocida, memorijalima, akademskom zajednicom i organizacijama civilnog društva o izradi Uredbe za izdavanje potvrda o statusu žrtava genocida i/ili porodica žrtava genocida nad Bošnjacima zaštićene zone UN-a „Srebrenica“ najkasnije 60 dana od dana stupanja na snagu ovog zakona.
- (4) Ured je u obavezi da dostavi Vladi Uredbu za izdavanje potvrda o statusu žrtava genocida i porodica žrtava genocida nad Bošnjacima zaštićene zone UN-a „Srebrenica“ najkasnije 150 dana od dana stupanja na snagu ovog zakona.
- (5) Vlada je dužna usvojiti Uredbu za izdavanje potvrda o statusu žrtava genocida i porodica žrtava genocida nad Bošnjacima zaštićene zone UN-a „Srebrenica“ za potrebe utvrđivanja statusa lica iz člana 5. st. (1) i (2) ovog zakona najkasnije 180 dana od dana stupanja na snagu ovog zakona.

Član 8.

(Dokazivanje statusa za ostvarivanje prava po drugim osnovama)

- (1) Lica iz člana 5. st. (3), (4) i (5) ovog zakona svoj status dokazuju u skladu sa Zakonom o izbjeglicama iz BiH i raseljenim osobama u BiH („Službeni glasnik BiH“, br. 23/99, 21/03 i 33/03).
- (2) Lica iz člana 5. stava (6) ovog zakona svoj status dokazuju u skladu sa Zakonom o pravima lica koja se iz Kantona Sarajevo vraćaju u prijeratna mjesta prijeratnog prebivališta („Službene novine Kantona Sarajevo“, br. 18/13, i 26/13-Ispravka).
- (3) Lica iz člana 5. stava (7) ovog zakona svoj status dokazuju na osnovu dokaza o direktnom srodstvu (otac/majka, djed/nana) sa licem koje ispunjava uslove iz člana 5. st. (3), (4), (5) ili (6) ovog zakona.
- (4) Lica iz člana 5. stava (8) ovog zakona svoj status dokazuju na osnovu važeće prijave o prebivalištu na području opštine Srebrenica.
- (5) Ukoliko javni poziv obuhvata pravna lica, a gdje se selekcija uslovljava suvlasništvom lica iz člana 5. st. (1), (2), (3), (4), (5), (6) ili (7) ovog zakona. dostavlja se dokaz koji je propisan ovim članom uz dokaz o suvlasništvu/učešću relevantnog fizičkog lica u pravnom licu.

Član 9.

(Pristup programima podrške)

Pristup programima podrške koji su uređeni ovim zakonom se ostvaruje:



Adresa: Reisa Džemaludina Čauševića 1, 71 000 Sarajevo
Tel: + 387 (0) 33 562-055, Fax: + 387 (0) 33 562-210
Web: <http://skupstina.ks.gov.ba>
E-mail: skupstina@skupstina.ks.gov.ba

- a) prijavom privrednog društva, poljoprivredne zadruge, obrta, udruženja građana, fondacije ili fizičkog lica koje ispunjava uslove javnih poziva posebne namjene koji se tiče realizacije programa utvrđenih ovim zakonom;
- b) dostavljanjem dokaza o ispunjavanju uslova za pristup određenoj podršci po osnovu ličnog statusa.

III – VRSTE PROGRAMA PODRŠKE

Član 10. (Vrste programa podrške)

Ovim zakonom se propisuje uspostava posebnih programa podrške:

- a) program obnove i rekonstrukcije objekata se realizira putem javnog poziva (stambeni/poslovni objekti i drugi objekti u vlasništvu/suvlasništvu fizičkih lica iz člana 5. st. (1), (2), (3), (4), (5), (6) i (7) ovog zakona koju planira i realizira Ured;
- b) program podrške infrastrukturnim projektima (elektrifikacija, vodovod i putna infrastruktura) u saradnji sa drugim institucijama na državnom, entitetskom i lokalnom nivou području regije istočna Bosna;
- c) program podrške obrazovanju i radnom osposobljavanju lica (stipendiranje i sufinansiranje studija, edukacija i osposobljavanja fizičkih lica iz člana 5. st. (1), (2), (3), (4), (5), (6), (7) i (8) ovog zakona) koju planira i realizira Ured uz konsultacije sa Ministarstvom za odgoj i obrazovanje Kantona Sarajevo i Ministarstvom za nauku, visoko obrazovanje i mlade Kantona Sarajevo;
- d) program podrške istraživačkim projektima o genocidu, povratku i ljudskim pravima (otvoren za fizička lica koja ispunjavaju uslove iz člana 5. st. (1), (2), (3), (4), (5), (6), (7) i (8) ovog zakona) koju planira i realizira Ured;
- e) Program besplatne pravne pomoći putem pravne službe Ureda (dostupan fizičkim licima koja ispunjavaju uslove iz člana 5. st. (1), (2), (3), (4), (5), (6), (7) i (8) ovog zakona i pravnim licima u kojima imaju suvlasništvo od najmanje 25% lica koje ispunjava jedan od navedenih uslova, a koja su registrovana na području regije istočna Bosna) koja će obuhvatiti zaštitu prava pred domaćim i međunarodnim sudovima se odnosi i na ostvarivanje prava i savjetovanje pri sastavljanju podnesaka, žalbi, zahtjeva i drugih pravnih akata koje upućuju jedinica lokalne samouprave i drugim institucijama uprave i organima Bosne i Hercegovine, entiteta Federacija BiH i Republika Srpska;
- f) program podrške investicijama na području jedinice lokalne samouprave Srebrenica (dostupan za privredna društva, obrte, zadruge i gazdinstva sa sjedištem ili registrovanom filijalom na području regije istočna Bosna) koju planira i realizira Ured;
- g) program podrške kulturnim, umjetničkim i sportskim projektima na području jedinice lokalne samouprave Srebrenica putem javnog poziva (dostupan za prijavu fizičkim i pravnim licima sa područja Kantona Sarajevo ili sa područja jedinice lokalne samouprave Srebrenica) koju planira i realizira Ured;

- h) program mobilnosti visokokvalifikovane radne snage na području jedinice lokalne samouprave Srebrenica putem javnog poziva (stipendiranje/finansiranje privremenog ili trajnog boravka visokokvalifikovanih lica za rad i doprinos zajednici u Srebrenici dostupan za prijavu fizičkim licima-državljanima BiH po ispunjavanju uslova iz člana 5. stav (8) ovog zakona) koju planira i realizira Ured;
- i) godišnji grant Memorijalnom centru Srebrenica-Potočari Spomen obilježje i mezarje za žrtve genocida iz 1995. godine (u daljem tekstu: Memorijalni centar) za istraživačke i razvojne aktivnosti;
- j) program podrške udruženjima građana i fondacija za aktivnosti održivog povratka, zaštite ljudskih prava i drugih aktivnosti vezanih za borbu protiv diskriminacije, govora mržnje, građanskog organizovanja na području jedinice lokalne samouprave Srebrenica putem javnog poziva (dostupan za prijavu udruženjima građana i fondacijama sa područja Kantona Sarajevo i sa područja jedinice lokalne samouprave Srebrenica) koju planira i realizira Ured;
- k) program učešća u subvencioniranju organizacije javnog prevoza na području jedinice lokalne samouprave Srebrenica, prevoza djece i đaka osnovnih i srednjih škola na području regije istočna Bosna, redovnog autobusnog saobraćaja na liniji Srebrenica-Sarajevo-Srebrenica koju planira i realizira Ured na osnovu javnog poziva, koji je otvoren za sva privredna društva koja ispunjavaju uslove za provedbu aktivnosti ove vrste transporta putnika;
- l) program podrške roditeljima i djeci kroz posebno aktivnosti podrške po rođenju djeteta, redovne podrške roditeljima sa troje i više djece do punoljetstva, nabavku školske opreme i drugih oblika dodatne asistencije za roditelje koji ispunjavaju uslove iz člana 5. stav (8) ovog zakona, koju planira i realizira Ured;
- m) program podrške ostvarivanju zdravstvene zaštite na području Kantona Sarajevo, što uključuje pristup konsultativno-specijalističkoj zaštiti, dijagnostici, banjskom liječenju, što će se refundacijom troškova realizirati Ured po osnovu zahtjeva za lica koja su obuhvaćena članom 5. st. (1), (2), (3), (4), (5), (6), (7) i (8) ovog zakona, a do potrošnje planiranih sredstava na godišnjem nivou za ove namjene.

IV– ORGANI ZA PROVOĐENJE MJERA

Član 11.

(Ured Vlade Kantona Sarajevo za podršku Srebrenici)

- (1) Vlada osniva Ured Vlade Kantona Sarajevo za podršku Srebrenici (u daljem tekstu: Ured), najkasnije u roku od 60 dana od dana stupanja na snagu ovog zakona.
- (2) Ured ima sjedište u Srebrenici i kancelarije u Sarajevu.
- (3) Prostor za smještaj i rad Ureda osigurat će Kanton, putem Stručne službe za zajedničke poslove Kantona Sarajevo.

- (4) Vlada Kantona Sarajevo je dužna, u skladu sa odredbama Zakona o državnoj službi Kantona Sarajevo („Službene novine Kantona Sarajevo“, br. 31/16 i 45/19) pokrenuti proceduru postavljenja šefa Ureda u roku od 30 dana od osnivanja Ureda.
- (5) Ured ima najmanje šest zaposlenika, i to: Šefa Ureda, četiri državna službenika i jednog namještenika, a što će se detaljnije urediti pravilnikom o unutrašnjoj organizaciji Ureda, koji donosi šef Ureda u roku od 30 dana od dana njegovog postavljenja.
- (6) Prednost pri zaposlenju u Uredu imaju lica koja ispunjavaju uslove iz člana 5. ovog zakona.
- (7) Šef Ureda za svoj rad i rad Ureda odgovara Vladi Kantona Sarajevo, u skladu sa članom 11. Zakona o državnoj službi u Kantonu Sarajevo..
- (8) O rezultatima rada provođenja Plana i programa mjera propisanih ovim zakonom, šef Ureda izvještava Vladu i Skupštinu Kantona Sarajevo, najkasnije do 31.03. tekuće godine za prethodnu godinu.

Član 12. **(Plan i program)**

- (1) Plan i program podrške (u daljnjem tekstu: Plan i program) kreira Ured i dostavlja Vladi.
- (2) U izradi Plana i programa iz stava (1) ovog člana sudjeluje Ured za borbu protiv korupcije i upravljanje kvalitetom Kantona Sarajevo sa ciljem osiguranja potpune transparentnosti i efektivnosti u provedbi mjera predviđenih ovim zakonom.
- (3) Plan i program sadrži metodologiju realizacije mjera, odnosno informaciju na koji način se realizira svaka od mjera (putem pojedinačnih zahtjeva, posebnih projekata i programa, javnih poziva i sl.), uz obavezno navođenja dinamike, rokova, nosilaca izvršenja mjera i način finansiranja). U zavisnosti od vrste mjere, Ured može konsultovati Vladu radi usaglašavanja i pronalaženja najboljeg modusa za realizaciju konkretne mjere.
- (4) Ukoliko se mjera iz Plana i programa realizira putem javnog poziva, isti se provodi putem komisije za provođenje javnog poziva koju imenuje premijer posebnim rješenjem sa utvrđenim zadacima i rokovima za provođenje procedure. Procedura objavljivanja, trajanje i sadržaj teksta javnog poziva, dodatna obavještenja po javnom pozivu i dostavljanje zahtjeva se provodi u skladu sa pozitivnim zakonskim i podzakonskim propisima.
- (5) Preliminarne rezultate javnog poziva utvrđuje komisija i objavljuje na internet stranici Vlade. O žalbama na preliminarnu listu javnog poziva odlučuje posebna komisija za žalbe koju imenuje Vlada, nakon čega se donosi konačna odluka o rezultatima javnog poziva.
- (6) Način rada, odlučivanje, i druga pitanja od značaja za rad komisije regulišu se poslovnikom o radu komisije, koji se donosi na konstituirajućoj sjednici Komisije.

V – POSTUPAK OSTVARIVANJA PRAVA

Član 13. **(Postupak realizacije programa)**

- (1) Programi podrške iz člana 10. ovog zakona mogu se realizovati na jedan od slijedećih načina:
 - a) putem javnih poziva;



- b) u saradnji sa opštinskim/općinskim, gradskim, entitetskim ili državnim vlastima na osnovu prethodno potpisanog Memoranduma o saradnji;
 - c) kontinuirana podrška na osnovu potreba lica iz člana 5. ovog zakona.
- (2) Plan i program iz člana 10. ovog zakona obavezno sadrži načine realizacije iz stava (1) ovog člana.
- (3) Ukoliko se mjera iz Plana i programa realizira putem javnog poziva iz tačke a) stava (1) ovog člana, isti se provodi putem komisije za provođenje javnog poziva koju imenuje Premijer posebnim rješenjem sa utvrđenim zadacima i rokovima za provođenje procedure. Procedura objavljivanja, trajanje i sadržaj teksta javnog poziva, dodatna obavještenja po javnom pozivu i dostavljanje zahtjeva se provodi u skladu sa pozitivnim zakonskim i podzakonskim propisima.
- (4) Preliminarne rezultate javnog poziva utvrđuje komisija i objavljuje na internet stranici Vlade. O žalbama na preliminarnu listu javnog poziva odlučuje rukovodilac Ureda nakon čega donosi konačnu odluku o rezultatima javnog poziva.
- (5) Način rada, odlučivanje, i druga pitanja od značaja za rad komisije regulišu se poslovníkom o radu komisije, koji se donosi na konstituirajućoj sjednici Komisije.

VI - IZVORI SREDSTAVA ZA FINANSIRANJE MJERA

Član 14. (Izvori i način finansiranja)

- (1) Izvori sredstava za finansiranje mjera iz ovog zakona su:
- a) Budžet;
 - b) kreditna sredstva;
 - c) donacije;
 - d) ostali izvori u skladu sa zakonom.
- (2) Godišnji iznos sredstava koji se obezbjeđuje u Budžetu za finansiranje Plana i programa ne može biti manji od 2.000.000,00 KM za finansiranje mjera iz člana 10. ovog zakona.
- (3) U iznos predviđen tačkom (2) ovog člana nisu uračunata sredstva za rad Ureda.
- (4) Donacije u smislu ovog zakona mogu biti u novcu, robi i uslugama. Sredstva iz donacija se koriste u skladu sa Planom i programom, ako donator ne odredi drugačiju namjenu.
- (5) Sredstva za finansiranje ovog zakona imaju poseban analitički kod.
- (6) Najmanje 200.000 KM sredstava Budžeta uplaćuje se Memorijalni centar Srebrenica-Potočari Spomen obilježje i mezarje za žrtve genocida iz 1995. godine godišnje kao grant u svrhu osiguranja kontinuiteta rada.
- (7) Sredstvima za finansiranje mjera iz ovog zakona raspolaže Vlada prema utvrđenom Planu i programu.

VII - NADZOR NAD PRIMJENOM ZAKONA



Član 15.
(Organi vršenja nadzora i inspeksijski nadzor)

- (1) Nadzor nad primjenom ovog zakona u smislu praćenja realizacije programa i projekata iz Plana i programa vrši Ministarstvo za rad, socijalnu politiku, raseljena lica i izbjeglice Kantona Sarajevo.
- (2) Inspeksijski nadzor nad primjenom ovog zakona vrši Kantonalna uprava za inspeksijske poslove, Upravni inspektorat Ministarstva pravde i uprave Kantona Sarajevo i Budžetski inspektorat Ministarstva finansija Kantona Sarajevo, u skladu sa svojim nadležnostima.

VIII – PRESTANAK PRAVA I KAZNE NE ODREDBE

Član 16.
(Promjena statusa)

Lica koja su ostvarila pravo po ovom zakonu, obavezna su u roku od 15 dana obavijestiti Ured o svakoj promjeni koja bi mogla uticati na nastavak ostvarivanja stečenih prava ili zbog koje to lice kao korisnik sredstava ili usluga gubi pravo u smislu ovog zakona.

Član 17.
(Kazne za prekršaje)

- (1) Novčanom kaznom u iznosu od 500,00 KM do 5.000,00 KM kaznit će se za prekršaj odgovorno lice u nadležnom organu uprave i/ili službenik organa uprave ako daje netačne podatke ili lažne izjave ili ako preusmjeri sredstva za finansiranje mjera iz ovog zakona u nenamjenske svrhe.
- (2) Novčanom kaznom u iznosu od 500,00 KM do 5.000,00 KM kaznit će se za prekršaj lice koje dostavi netačne podatke ili poduzme druge aktivnosti kako bi odgovorni organ doveo u zabludu sa ciljem ostvarenja nepripadajuće koristi po odredbama ovog zakona.
- (3) Sva lica koja ne dostave zatražene izvještaje po osnovu ostvarenih prava do rokova propisanih uslovima poziva za realizaciju različitih programa u okviru ovog zakona ne mogu ostvariti prava po osnovu ovog zakona od godinu dana do trajne zabrane apliciranja za sredstva prema Uredu.

IX – PRELAZNE I ZAVRŠNE ODREDBE

Član 18.
(Donošenje propisa)

Vlada je dužna donijeti propis iz člana 7. ovog zakona u rokovima propisanim ovim zakonom.

Član 19.
(Stupanje na snagu)

Ovaj Zakon stupa na snagu osmog dana od dana objavljivanja u „Službenim novinama Kantona Sarajevo“.

Broj:01-02-18633/22
29.04.2022. godine
S A R A J E V O

PREDSJEDAVAJUĆI
SKUPŠTINE KANTONA SARAJEVO

Elvedin Okerić



Adresa: Reisa Džemaludina Čauševića 1, 71 000 Sarajevo
Tel: + 387 (0) 33 562-055, Fax:+ 387 (0) 33 562-210
Web: <http://skupstina.ks.gov.ba>
E-mail: skupstina@skupstina.ks.gov.ba